

Na osnovu člana III.1 tačka b) koji je izmijenjen amandmanima VIII, LXXXIX i CVI, a u vezi s članom IV.A.20 (1) i člana III.2 tačka h) Ustava Federacije Bosne i Hercegovine, Parlament Federacije BiH donosi:

ZAKON O UGOSTITELJSTVU FEDERACIJE BOSNE I HERCEGOVINE

DIO PRVI – OSNOVNE ODREDBE POGLAVLJE I

Član 1. (Predmet Zakona)

Ovim Zakonom uređuju se uslovi za obavljanje ugostiteljske djelatnosti, osnivanje i prestanak rada ugostiteljske radnje i ostale vrste ugostiteljske djelatnosti, vrste i kategorije ugostiteljskih objekata, ugostiteljske usluge u domaćinstvu i seoskom domaćinstvu, registri u ugostiteljstvu, oblici ugostiteljske djelatnosti, kategorizacija ugostiteljskih objekata, prava i obaveze ugostitelja, upravni nadzor i ostala pitanja od značaja za oblast ugostiteljstva.

Član 2. (Definicije)

Pojmovi koji se upotrebljavaju u ovom zakonu imaju sljedeće značenje:

- a) **Boravišna taksa** je naknada za korištenje turističke, komunalne i saobraćajne infrastrukture i suprastrukture na području jedinice lokalne samouprave ili u turističkom mjestu koju plaća domaći ili strani državljanin koji izvan svog mjesta prebivališta koristi uslugu noćenja u ugostiteljskom objektu za smještaj;
- b) **HACCP (Hasap)** je sistem sigurnosti hrane koji se zasniva na analizi i kontroli potencijalnih bioloških/mikrobioloških, hemijskih i fizičkih opasnosti kojima su izložene sirovine, mogućih opasnosti pri rukovanju, proizvodnji, distribuciji i konzumiranju krajnjeg proizvoda;
- c) **Iznajmljivač** je fizičko lice koje pruža ugostiteljske usluge smještaja u vlastitom domaćinstvu za koje posjeduje rješenje o pružanju usluga u domaćinstvu;
- d) **Kampovanje** je smještaj i boravak gostiju u odgovarajućoj opremi za smještaj na otvorenom prostoru;
- e) **Kategorizacija ugostiteljskih objekata** je postupak utvrđivanja minimalnih uslova u pogledu uređenja, opreme i usluge u ugostiteljskim objektima za smještaj na osnovu kojeg se objekti razvrstavaju u vrste i kategorije u zavisnosti od nivoa ispunjenosti minimalnih uslova;
- f) **Catering (ketering) objekti** su vrsta ugostiteljskih objekata u kojima se pripremaju obroci u centralnim jedinicama za potrošnju na drugom mjestu (u prevoznim sredstvima, na priredbama, svečanostima) i iz kojih se vrši snabdijevanje korisnika tom hranom;

- g) **Catering (ketering) usluga** je usluga koja podrazumijeva pripremanje hrane i pića, dostavljanje na drugom mjestu, sa ili bez usluživanja, a po utvrđenim minimalnim uslovima;
- h) **Posebne okolnosti** podrazumijevaju događaj ili određeno stanje koje se nije moglo predvidjeti i na koje se nije moglo utjecati, a koje ugrožava život i zdravlje građana, imovinu veće vrijednosti, znatno narušava okoliš, narušava privrednu aktivnost ili uzrokuje znatnu privrednu štetu;
- i) **Minimalni uslovi** su uslovi koji moraju biti ispunjeni u svakom objektu za obavljanje ugostiteljske djelatnosti u pogledu uređenja i opreme ugostiteljskih objekata, usluga, a propisani su ovim Zakonom i propisima donesenim na osnovu ovog Zakona;
- j) **Seosko domaćinstvo** je porodično domaćinstvo smješteno u ruralnom (seoskom) okruženju s elementima lokalnog obilježja i naslijeđa, za koje posjeduje rješenje o pružanju usluga smještaja u seoskom domaćinstvu;
- k) **Smještajna jedinica** je opremljena prostorija, odnosno skup opremljenih prostorija (soba, apartman, studio apartman) ili posebno uređen prostor na otvorenom (kamp mjesto, kamp parcela), unutar ugostiteljskog objekta za smještaj, koji se stavlja na raspolaganje korisniku;
- l) **Standardna ploča** je jednoobrazno dimenzionirana i sadržajno određena tabla za označavanje kategorije ili standarda te vrste ugostiteljskog objekta;
- m) **Ugostitelj** je pravno ili fizičko lice koje obavlja ugostiteljsku djelatnost u skladu s odredbama ovog Zakona;
- n) **Ugostiteljski objekt** je funkcionalno povezan, uređen i opremljen prostor koji ispunjava propisane minimalne uslove za pružanje ugostiteljskih usluga, odnosno za obavljanje ugostiteljske djelatnosti, propisanih ovim Zakonom.

DIO DRUGI – SADRŽAJ UGOSTITELJSKE DJELATNOSTI

POGLAVLJE II.

Član 3. (Pojam ugostiteljske djelatnosti)

- (1) Ugostiteljska djelatnost u smislu ovog Zakona je pružanje usluga smještaja, pripremanje i usluživanje hrane, pića i napitaka za direktnu potrošnju te dostavljanje i/ili usluživanje na drugom mjestu.
- (2) Ugostiteljsku djelatnost pravno lice može obavljati kao ugostitelj pravno lice ili putem svojih podružnica.
- (3) Ugostiteljsku djelatnost fizičko lice može obavljati kao osnovno, dopunsko i dodatno zanimanje u skladu s ovim Zakonom.
- (4) Ugostiteljska djelatnost može se obavljati trajno i sezonski, a najduže devet mjeseci unutar jedne kalendarske godine.

Član 4. **(Nadležni organ)**

- (1) Federalno ministarstvo okoliša i turizma (u daljnjem tekstu: Ministarstvo) nadležno je za rješavanje o zahtjevu za obavljanje ugostiteljske djelatnosti i ispunjavanje minimalnih uslova, vrstu i kategoriju objekata iz skupine „Hoteli i sličan smještaj“ za sve objekte iz kategorije četiri i pet zvjezdica.
- (2) Kantonalno ministarstvo nadležno za poslove ugostiteljstva nadležno je za rješavanje o zahtjevu za obavljanje ugostiteljske djelatnosti i zahtjevu za ispunjavanje minimalnih uslova, vrstu i kategoriju objekata iz skupine „Hoteli i sličan smještaj“ za sve objekte iz kategorije dvije i tri zvjezdice i za hotel baštinu.
- (3) Gradski/općinski organ jedinice lokalne samouprave nadležan je za rješavanje o zahtjevu za obavljanje ugostiteljske djelatnosti i ispunjavanje minimalnih uslova, vrstu i kategoriju za ostale vrste ugostiteljskih djelatnosti: skupina „Odmarališta i slični objekti“ za kraći odmor, za sve objekte iz skupine „Kampovi i prostori za kampovanje“, ugostiteljske usluge „Smještaja u domaćinstvu i seoskom domaćinstvu“ (kuće, stanovi, sobe) i djelatnost pripreme i usluživanja hrane i pića.

Član 5. **(Podsticaji u ugostiteljstvu)**

Nadležni organi iz člana 4. ovog Zakona mogu u cilju usmjeravanja i podsticanja razvoja ugostiteljstva planirati sredstva za finansiranje projekata iz oblasti ugostiteljstva u skladu s propisima kojima se regulira oblast državne pomoći i podsticanja razvoja male privrede.

Član 6. **(Pružanje ugostiteljskih usluga na koje se ne primjenjuju odredbe ovog Zakona)**

- (1) Ne smatra se obavljanjem ugostiteljske djelatnosti pružanja usluga smještaja, ishrane i pića i na iste se ne primjenjuju odredbe ovog Zakona, i to:
 - a) pružanje usluga ishrane i smještaja u objektima ustanova socijalne pomoći, zdravstva, odgoja i obrazovanja ako te usluge pružaju zaposlenici navedenih ustanova zaposlenicima ili korisnicima svojih ustanova, ili zaposlenicima ili korisnicima neke druge od navedenih ustanova
 - b) pružanje usluga ishrane i smještaja pripadnika oružanih snaga kad ih pripadnici oružanih snaga organiziraju za sebe i pružaju u svojim objektima
 - c) pružanje usluga ishrane i smještaja policije kad ih pripadnici policije organiziraju za sebe i pružaju u svojim objektima
 - d) pružanje usluga ishrane („toplog obroka“), pića i bezalkoholnih pića, bez namjere stjecanja dobiti ili drugih privrednih koristi, koje za potrebe svojih zaposlenika organiziraju pravna i fizička lica te federalni organi i organizacije i drugi organi uprave i organizacije u svojim poslovnim prostorijama i prostorima tokom radnog vremena
 - e) organiziranje ishrane i smještaja te pripremanje i usluživanje jela i pića u objektima i kampovima u kojima se organizirano provodi zbrinjavanje evakuiranih građana, koje u slučaju velike nesreće i katastrofe organiziraju i provode operativne snage sistema civilne zaštite.

(2) Ako se radnje pripremanja i usluživanja jela, pića te pružanja usluga smještaja vrše u uslovima i na načine koji upućuju na obavljanje ugostiteljske djelatnosti, a lice koje ih obavlja ne može dokazati zakonitost svoga poslovanja, smatra se obavljanjem neregistrirane ugostiteljske djelatnosti, osim u slučajevima pobrojanim u stavu (1) ovog člana.

POGLAVLJE III – USLOVI ZA OBAVLJANJE UGOSTITELJSKE DJELATNOSTI

Član 7.

(Uslovi za izdavanje rješenja pravnom licu o obavljanju ugostiteljske djelatnosti)

Nadležni organ iz člana 4. ovog Zakona izdat će rješenje o obavljanju ugostiteljske djelatnosti pravnom licu koje ispunjava sljedeće uslove:

- a) upisano je u registar društava u skladu s propisima kojima se uređuje registracija poslovnih subjekata u Federaciji BiH (u daljnjem tekstu: FBiH)
- b) priloži dokaz o vlasništvu objekta ili ugovor o zakupu, koncesiji i
- c) priloži dokaz da poslovni prostor ispunjava propisane minimalne uslove, prema mjestu sjedišta objekta.

Član 8.

(Uslovi za izdavanje rješenja fizičkom licu o obavljanju ugostiteljske djelatnosti)

(1) Nadležni organ iz člana 4. stava (3) ovog Zakona nadležan za poslove ugostiteljstva izdat će rješenje o obavljanju ugostiteljske djelatnosti u osnovnom zanimanju fizičkom licu ako ispunjava sljedeće uslove:

- a) da je državljanin Bosne i Hercegovine
- b) da ima navršenih 18 godina
- c) da je zdravstveno sposoban
- d) da posjeduje najmanje treći stepen stručne spreme
- e) da nema zasnovan radni odnos, odnosno nema već osnovanu ugostiteljsku radnju
- f) da pravosnažnom sudskom presudom, rješenjem o prekršaju ili upravnim aktom nije izrečena zaštitna mjera zabrane obavljanja ugostiteljske djelatnosti
- g) da ima poslovni prostor za koji ima dokaz o pravu vlasništva ili ugovor o zakupu i
- h) da taj prostor ispunjava propisane minimalne uslove.

(2) Fizičko lice može obavljati ugostiteljsku djelatnost kao dopunsko ili dodatno zanimanje ako ispunjava uslove iz stava (1) ovog člana i ako već ima zasnovan radni odnos, ali isključivo putem zaposlenika koji mora biti u radnom odnosu kod vlasnika ugostiteljske djelatnosti i ispunjavati uslove iz stava (1) od tačke a) do tačke d).

(3) Fizičko lice može obavljati ugostiteljsku djelatnost kao dopunsku djelatnost najduže 20 sati sedmično, uz plaćanje poreza u skladu s propisima kojima se uređuje plaćanje poreza na lične dohotke.

(4) Strani državljanin može obavljati ugostiteljsku djelatnost pod uslovom da ispunjava uslove iz stava (1) od tačke b) do tačke h) i da ima radnu dozvolu u skladu s propisima koji reguliraju zapošljavanje stranaca.

Član 9.
(Prostor u kojem se obavlja ugostiteljska djelatnost)

(1) Ugostiteljska djelatnost obavlja se u ugostiteljskom objektu, prostoriji i na prostorima koji čine građevinsku cjelinu ili koji su funkcionalno povezani, odnosno koji u okviru šire građevinske cjeline imaju potrebnu funkcionalnost.

(2) Ugostiteljska djelatnost može se obavljati i u objektu, prostoriji i na prostoru gdje se obavlja druga djelatnost ako su za obavljanje ugostiteljske djelatnosti ispunjeni uslovi propisani ovim Zakonom, propisima donesenim na osnovu ovog Zakona i drugim propisima.

(3) Za obavljanje ugostiteljske djelatnosti u ugostiteljskom objektu moraju biti ispunjeni minimalni uslovi za ugostiteljsku djelatnost u pogledu uređenja i opreme ugostiteljskih objekata, usluga, kao i drugi uslovi propisani ovim Zakonom i propisima donesenim na osnovu ovog Zakona.

(4) Ugostiteljski objekt mora ispunjavati uslove u pogledu gradnje, uređaja, opreme, zaštite na radu, zaštite od požara, zaštite od buke, sanitarno-higijenske i druge propisane uslove za pružanje pojedinih vrsta ugostiteljskih usluga.

(5) U ugostiteljskim objektima ugostitelji mogu obavljati djelatnost trgovine na malo duhanom i prerađevinama od duhana, trgovine na malo štampom i suvenirima ako ispunjavaju uslove određene posebnim propisima.

(6) Ugostiteljski objekt u kojem je obezbijeđeno nesmetano kretanje za osobe s umanjenim tjelesnim sposobnostima, pored uslova propisanih ovim Zakonom, mora ispunjavati i uslove regulirane propisima iz oblasti prostornih standarda, urbanističko-tehničkih uslova i normativa za sprečavanje stvaranja arhitektonsko-urbanističkih prepreka za osobe s umanjenim tjelesnim sposobnostima.

(7) Ministar okoliša i turizma (u daljnjem tekstu: ministar) pravilnikom propisuje minimalne uslove iz stava (3) ovog člana za svaku vrstu ugostiteljskog objekta.

Član 10.
(Poslovna jedinica)

Ako ugostitelj obavlja ugostiteljsku djelatnost u obliku pravnog lica, a djelatnost obavlja u više objekata, dužan je da za obavljanje poslova iz okvira djelatnosti u svakom objektu obrazuje poslovnu jedinicu (podružnicu) i pribavi rješenje za obavljanje ugostiteljske djelatnosti u skladu s propisima o registraciji privrednih subjekata u FBiH.

Član 11.
(Period poslovanja ugostitelja)

(1) Ugostitelj posluje tokom cijele kalendarske godine ili sezonski, najduže devet mjeseci tokom kalendarske godine.

(2) Ugostitelj može poslovati i povremeno (za vrijeme održavanja manifestacija, sajмова, prigodnih priredbi i sl.).

Član 12.
(Određivanje radnog vremena ugostiteljskih objekata)

(1) Ugostiteljski objekti iz skupina „Hoteli“, „Kampovi“ i „Ostali ugostiteljski objekti za smještaj“ obavezno rade od 0:00 do 24:00 sata svaki dan, a ostali ugostiteljski objekti mogu raditi:

- a) iz skupina „Restorani“ i „Barovi“ od 6:00 do 24:00 sata
- b) iz skupine „Barovi“ koji ispunjavaju uslove za rad noću u skladu s posebnim propisima od 21:00 do 6:00 sati, samo u zatvorenim prostorima
- c) iz skupina „Restorani“ i „Barovi“ koji se nalaze izvan naseljenih područja naselja od 0:00 do 24:00 sata
- d) na aerodromima, željezničkim stanicama, autobusnim stanicama i slično u radnom vremenu objekta u kojem se nalaze.

(2) Gradski/općinski organ jedinica lokalne samouprave svojom odlukom:

- a) propisuje radno vrijeme ugostiteljskih objekata iz skupina „Objekti jednostavnih usluga“ i „Catering objekti“
- b) propisuje radno vrijeme prostora za usluživanje na otvorenom ugostiteljskih objekata
- c) određuje lokacije izvan naseljenih područja naselja iz stava (1) tačke c) ovog člana za svoje područje
- d) propisuje razloge za određivanje ranijeg završetka radnog vremena pojedinih ugostiteljskih objekata
- e) može produžiti propisano radno vrijeme ugostiteljskih objekata iz stava (1) tačke a) ovog člana, bilo svih ili samo pojedinih vrsta ugostiteljskih objekata, uz propisivanje uslova koji moraju biti ispunjeni za rad ugostiteljskog objekta u produženom radnom vremenu, a uz mišljenje turističke zajednice toga područja
- f) može u određenim dijelovima područja jedinice lokalne samouprave odrediti produženo radno vrijeme svih ili samo pojedinih vrsta ugostiteljskih objekata iz stava (1) tačke a) ovog člana, uz propisivanje uslova koji moraju biti ispunjeni za rad ugostiteljskog objekta u produženom radnom vremenu, a uz mišljenje turističke zajednice tog područja.

(3) Gradski/općinski organ jedinica lokalne samouprave može:

- a) po službenoj dužnosti rješenjem, za pojedine ugostiteljske objekte najduže za dva sata odrediti raniji završetak radnog vremena od radnog vremena propisanog stavom (1) tačkom a) ovog člana te radnog vremena propisanog odlukom gradskog ili općinskog nadležnog organa iz stava (2) tačaka a), e) i f) ovog člana, u skladu s kriterijima propisanim istom odlukom tog organa
- b) na zahtjev ugostitelja za pojedine ugostiteljske objekte iz stava (1) tačke a) ovog člana, rješenjem odrediti drugačije radno vrijeme radi organiziranja prigodnih proslava (dočeka Nove godine, svadbi, maturskih zabava i sličnih događanja)
- c) za ugostiteljske objekte iz stava (1) tačke a) ovog člana za vrijeme održavanja manifestacija, sportskih događanja, muzičkih festivala i slično odlukom odrediti drugačije radno vrijeme.

(4) Radno vrijeme ugostiteljskih sadržaja u ugostiteljskim objektima za smještaj ne mora biti istovjetno s radnim vremenom ugostiteljskog objekta, ali u tom slučaju ugostitelj je dužan na vidan način unutar ugostiteljskog objekta istaknuti radno vrijeme pojedinog ugostiteljskog sadržaja i istog radnog vremena se pridržavati.

Član 13.

(Rad ugostiteljskih objekata u posebnim okolnostima)

(1) Federalna uprava civilne zaštite može odlukom privremeno urediti ili zabraniti rad svih ili pojedinih skupina i/ili vrsta ugostiteljskih objekata ili ograničiti radno vrijeme pojedinih ili

svih skupina i/ili vrsta ugostiteljskih objekata propisanih članom 33. ovog Zakona, te pružalaca ugostiteljskih usluga iz članova 44. i 50. ovog Zakona na cijelom ili pojedinom području FBiH, u uslovima posebnih okolnosti.

(2) Za vrijeme važenja odluke iz stava (1) ovog člana na ugostiteljske objekte koji su obuhvaćeni tom odlukom ne primjenjuju se odredbe člana 12. ovog Zakona.

POGLAVLJE IV – OBAVEZE UGOSTITELJA

Član 14. (Obaveze ugostitelja)

(1) U obavljanju ugostiteljske djelatnosti ugostitelj je obavezan:

- a) na ulazu u ugostiteljski objekt vidno istaknuti natpis s oznakom vrste i kategorije ugostiteljskog objekta u skladu s rješenjem nadležnog organa
- b) na ulazu u ugostiteljski objekt vidno istaknuti obavijest o radnom vremenu i istog se pridržavati u poslovanju
- c) istaknuti cijene hrane i pića na cjenovnicima, koji moraju biti dostupni korisnicima usluga u svako vrijeme
- d) pridržavati se istaknutih odnosno objavljenih cijena
- e) utvrditi normative o utrošku namirnica i pića za pojedine usluge hrane i pića koje je, na zahtjev, dužan predočiti gostu
- f) vidno istaknuti upozorenje o zabrani prodaje, upotrebe i posluživanja cigareta, alkohola i vodenih lula / nargila licima mlađim od 18 godina te natpis „Cigarete, alkohol i vodena lula / nargila su štetni po zdravlje“
- g) u propagandnim publikacijama ugostiteljskog objekta za smještaj i u sredstvima javnog oglašavanja obavezno naznačiti vrstu, podvrstu i kategoriju objekta koja mu je određena
- h) osigurati goste od posljedica nesretnog slučaja
- i) u svakom ugostiteljskom objektu držati i voditi knjigu gostiju, dnevno i ažurno
- j) vidno istaknuti cijene usluga smještaja i pridržavati se istaknutih cijena
- k) utvrditi kućni red u ugostiteljskom objektu za smještaj, a izvod iz kućnog reda na vidnom mjestu obavezno istaknuti u svim smještajnim jedinicama
- l) ako ugostitelj organizira usluge prevoza za svoje goste, obavezan je biti registriran za tu vrstu djelatnosti ili imati zaključen ugovor s prevoznikom.

(2) U poslovanju s hranom u svim fazama pripremanja jela, proizvodnje i usluživanja hrane ugostitelji koji imaju kuhinju kao poseban minimalni uslov za obavljanje ugostiteljske djelatnosti obavezni su obezbijediti sistemsko provođenje općih i specifičnih uslova higijene hrane, u skladu s propisima iz oblasti zdravstvene ispravnosti hrane.

(3) Prilikom obavljanja ugostiteljske djelatnosti ugostitelj je dužan u okviru ugostiteljskog objekta utvrditi i po istoj cijeni naplaćivati pružene usluge domaćim i stranim državljanima.

Član 15. (Naziv ugostiteljskog objekta)

(1) Ugostiteljski objekt može imati naziv jedne vrste ugostiteljskog objekta.

(2) Izuzetno od stava (1) ovog člana ugostiteljski objekt može imati naziv dviju vrsta ugostiteljskih objekata ako prostor tog objekta ispunjava uslove propisane ovim Zakonom i propisima donesenim na osnovu ovog Zakona za obje vrste.

(3) Naziv vrste ugostiteljskog objekta može se promijeniti ako su ispunjeni uslovi propisani za drugu vrstu, i za to izdato odgovarajuće rješenje nadležnog organa, u skladu s odredbama ovog Zakona.

Član 16.
(Knjiga gostiju i knjiga žalbi)

- (1) Ugostitelj vodi knjigu gostiju i knjigu žalbi.
- (2) Knjige iz stava (1) ovog člana mogu se voditi i u elektronskom obliku, s tim da ugostitelj u svakom trenutku osigurava inspekcijskim organima pristup istim.
- (3) Ministar pravilnikom propisuje oblik, sadržaj i način vođenja knjige gostiju i knjige žalbi.

Član 17.
(Pripremanje i usluživanje duhana za vodenu lulu kao duhanskog proizvoda)

- (1) Ugostiteljski objekt može pribaviti odobrenje za usluživanje duhana za vodenu lulu / nargilu od nadležnog organa iz člana 4. ovog Zakona, uz prethodno pribavljanje dokaza o ispunjavanju sanitarnih uslova za ugostiteljske objekte koji pružaju usluge pripremanja i usluživanja duhana za vodenu lulu.
- (2) Ministar i ministar zdravstva propisuju sanitarne uslove za ugostiteljske objekte koji pružaju usluge pripremanja i usluživanja duhana za vodenu lulu.

Član 18.
(Mogućnost uvođenja HACCAP sistema)

Ugostitelji mogu uspostaviti i provesti redovne kontrole higijenskih uslova pripremanja hrane u ugostiteljskom objektu provođenjem preventivnog postupka samokontrole, u skladu s Principima sistema analize opasnosti i kritičnih kontrolnih tačaka (HACCAP standard), a u skladu sa zakonom kojim je uređena oblast proizvodnje, prerade, skladištenja i distribucije hrane, kao i vršiti kontrolu mikrobiološke čistoće u skladu s posebnim propisom iz oblasti zaštite stanovništva od zaraznih bolesti.

Član 19.
(Oglašavanje i reklamiranje usluga)

Prilikom oglašavanja i reklamiranja usluga i isticanja poruka u komercijalnom poslovanju ugostitelj ne smije koristiti oznaku propisane vrste i kategorije ugostiteljskog objekta koja nije utvrđena rješenjem nadležnog organa odnosno Ministarstva.

Član 20.
(Zabrana usluživanja alkoholnih pića i vodene lule maloljetnim licima)

- (1) U ugostiteljskim objektima zabranjeno je vršiti prodaju i usluživanje alkoholnih pića, cigareta i korištenje vodene lule licima mlađim od 18 godina.
- (2) U ugostiteljskom objektu u kojem se uslužuju alkoholna pića, cigarete i vodene lule mora na vidnom mjestu biti istaknuta oznaka o zabrani usluživanja odnosno konzumiranja alkoholnih pića, cigareta i vodenih lula licima mlađim od 18 godina.

**POGLAVLJE V – OSNIVANJE I PRESTANAK OBAVLJANJA UGOSTITELJSKE
DJELATNOSTI**

Član 21.

(Odobrenje za osnivanje ugostiteljske djelatnosti)

Obavljanje ugostiteljske djelatnosti zasniva se izdavanjem rješenja kojim se odobrava osnivanje ugostiteljske djelatnosti, koje izdaje nadležni organ iz člana 4. ovog Zakona, u zavisnosti od vrste i kategorije ugostiteljskog objekta.

Član 22.

(Zahtjev za obavljanje ugostiteljske djelatnosti)

(1) Ugostitelj podnosi zahtjev za obavljanje ugostiteljske djelatnosti nadležnom organu iz člana 4. ovog Zakona.

(2) Uz zahtjev za obavljanje ugostiteljske djelatnosti i kategorizaciju objekta ugostitelj prilaže dokaze u skladu s članom 7. ovog Zakona ako je pravno lice i u skladu s članom 8. ovog Zakona ako je fizičko lice.

(3) Ugostitelj koji ne ispunjava uslove iz člana 8. ovog Zakona može predati zahtjev za obavljanje ugostiteljske djelatnosti i kategorizaciju objekta za lice koje će zaposliti, a koje ispunjava uslove iz člana 8. ovog Zakona.

Član 23.

(Rješenje o osnivanju ugostiteljske djelatnosti)

(1) Nadležni organ iz člana 4. ovog Zakona u roku od 15 dana od dana podnošenja potpunog zahtjeva izdaje rješenje kojim se odobrava osnivanje ugostiteljske djelatnosti ako su ispunjeni uslovi iz člana 22. ovog Zakona, u protivnom rješenjem će se odbiti zahtjev.

(2) Protiv rješenja iz stava (1) ovog člana može se izjaviti žalba nadležnom drugostepenom organu u roku od 15 dana od dana dostavljanja rješenja.

(3) Na provođenje upravnog postupka primjenjuju se propisi o upravnom postupku i upravnom sporu.

Član 24.

(Sadržaj rješenja o osnivanju ugostiteljske djelatnosti)

Rješenje kojim se odobrava osnivanje ugostiteljske djelatnosti sadrži:

- a) ime i prezime, jedinstveni matični broj i adresu prebivališta podnosioca zahtjeva
- b) naziv ugostiteljske djelatnosti
- c) mjesto, ulicu i broj objekta u kojem se pruža usluga
- d) šifru, djelatnost, vrstu i kategoriju ugostiteljskog objekta
- e) vrstu usluge koja se pruža
- f) površinu objekta odnosno prostora u kojem se obavlja ugostiteljska djelatnost
- g) naznaku o pružanju usluga tokom cijele godine ili sezonski.

Član 25.

(Registar ugostitelja)

(1) Nadležni organ vodi registar ugostitelja.

(2) Oblik, sadržaj i način vođenja registra ugostitelja propisuje ministar.

(3) Rješenje kojim se odobrava osnivanje ugostiteljske djelatnosti po pravosnažnosti upisuje se u registar ugostitelja.

(4) Od dana upisa u registar ugostitelja ugostitelju počinju teći prava i obaveze u skladu s ovim Zakonom i drugim propisima.

(5) Ugostitelj je dužan otpočeti s obavljanjem ugostiteljske djelatnosti u roku od šest mjeseci od dana upisa u registar ugostitelja.

Član 26.

(Obavještenje o upisu u registar ugostitelja)

Rješenje o upisu subjekta u registar ugostitelja nadležni organ dostavlja nadležnoj organizacijskoj jedinici Porezne uprave Federacije Bosne i Hercegovine, nadležnoj tržišnoj, turističko-ugostiteljskoj inspekciji i drugim organima koji vrše nadzor ili vode službenu evidenciju u oblasti ugostiteljstva.

Član 27.

(Prestanak obavljanja ugostiteljske djelatnosti)

Prestanak obavljanja ugostiteljske djelatnosti može biti privremeni prestanak obavljanja ugostiteljske djelatnosti i stalni prestanak ugostiteljske djelatnosti.

Član 28.

(Privremeni prestanak obavljanja ugostiteljske djelatnosti)

(1) Ugostitelj može privremeno obustaviti obavljanje djelatnosti u trajanju do jedne godine, o čemu pisanim putem izvještava nadležni organ iz člana 4. ovog Zakona u roku od sedam dana od dana obustave.

(2) Izuzetno od stava (1) ovog člana, ugostitelj može obustaviti obavljanje djelatnosti u dužem periodu u slučaju bolesti ili porodiljskog odsustva, u skladu s propisima koji reguliraju radne odnose.

(3) Privremeno obustavljanje obavljanja ugostiteljske djelatnosti utvrđuje rješenjem nadležni organ iz člana 4. ovog Zakona.

(4) Za vrijeme trajanja privremene obustave obavljanja ugostiteljske djelatnosti ugostitelj ne smije obavljati djelatnost.

(5) O ponovnom početku obavljanja djelatnosti ugostitelj je dužan pisanim putem izvijestiti nadležni organ iz člana 4. ovog Zakona najkasnije u roku od sedam dana po isteku vremena privremene obustave ugostiteljske djelatnosti.

Član 29.

(Stalni prestanak obavljanja ugostiteljske djelatnosti odjavom ugostitelja)

(1) Rješenje kojim se odobrava osnivanje ugostiteljskog objekta prestaje važiti odjavom ili po sili zakona.

(2) Ugostitelj je dužan odjaviti obavljanje ugostiteljske djelatnosti pisanim putem nadležnom organu prije prestanka rada.

(3) Prestanak obavljanja ugostiteljske djelatnosti odjavom utvrđuje se danom navedenim u odjavi, s tim da se obavljanje ugostiteljske djelatnosti ne može odjaviti unatrag.

(4) Ako u odjavi nije naznačen datum prestanka obavljanja ugostiteljske djelatnosti, prestanak se utvrđuje danom podnošenja zahtjeva za odjavu.

Član 30.

(Prestanak važenja rješenja o osnivanju ugostiteljske djelatnosti)

(1) Rješenje kojim se odobrava osnivanje ugostiteljske djelatnosti prestaje važiti po sili zakona:

- a) u slučaju smrti ugostitelja
- b) ako ugostitelj ne započne obavljati ugostiteljsku djelatnost u roku od šest mjeseci od dana upisa u registar ugostitelja
- c) ako je pravosnažnim aktom ugostitelju izrečena zaštitna mjera zabrane obavljanja ugostiteljske djelatnosti za vrijeme dok ta mjera traje
- d) ako je inspekcijskim nadzorom utvrđeno da nisu ispunjeni uslovi propisani ovim Zakonom, propisima donesenim na osnovu ovog Zakona i drugim propisima, a utvrđeni nedostaci nisu otklonjeni u ostavljenom roku
- e) raskidom ugovora o zakupu ili istekom ugovornog perioda.

(2) Prestanak važenja po sili zakona utvrđuje organ koji je donio rješenje o osnivanju ugostiteljske djelatnosti.

Član 31.

(Nastavak obavljanja djelatnosti u slučaju smrti ugostitelja)

U slučaju smrti ugostitelja vlasnika ugostiteljske djelatnosti članovi zajedničkog domaćinstva mogu nastaviti obavljati djelatnost putem zaposlenika, ako on ispunjava uslove iz člana 8. ovog Zakona, u trajanju do dvanaest mjeseci.

Član 32.

(Brisanje ugostiteljske djelatnosti iz registra ugostitelja)

(1) O prestanku važenja rješenja o odobrenju osnivanja ugostiteljske djelatnosti nadležni organ donosi rješenje.

(2) Po pravosnažnosti rješenja ugostiteljska djelatnost se briše iz registra.

(3) O brisanju iz registra ugostitelja nadležni organ obavještava nadležnu organizacijsku jedinicu Porezne uprave, turističko-ugostiteljsku inspekciju i druge organe koji vrše nadzor ili vode službenu evidenciju u oblasti ugostiteljstva dostavljanjem pravosnažnog rješenja.

POGLAVLJE VI – RAZVRSTAVANJE UGOSTITELJSKIH OBJEKATA

Član 33.

(Vrste ugostiteljskih objekata)

(1) Ugostiteljski objekti mogu biti:

- a) „Hoteli i sličan smještaj“, uključujući hotele, hotele baštine, turistička naselja (hotelska, apartmanska i slična naselja), apartmanske hotele i motele
- b) „Odmarališta i slični objekti za kraći odmor“, uključujući dječija i druga odmarališta, stanove za odmor i bungalove, seoske kuće i kolibe bez usluga održavanja, omladinske hostele i planinarske domove

- c) „Kampovi i prostori za kampovanje“, uključujući kamp-kućice ili kamp-prikolice, prostore za kampovanje i logorovanje s ciljem razonode, lova ili ribolova
- d) „Ostali smještaj“, uključujući studentske domove, školske domove, radničke hostele, prenoćišta, pansione, spavaća kola na željeznici (vagone za spavanje)
- e) „Domaćinstva i seoska domaćinstva“, uključujući kuće, stanove i sobe u kojima se pruža ugostiteljska djelatnost
- f) „Ugostiteljski objekti u kojima se priprema i poslužuje hrana i pića“, uključujući restorane, restorane-salone za posebne prilike, kafeterije, restorane brze hrane, mjesta za pripremu obroka za konzumiranje van objekta pripreme, kamione za prodaju sladoleda, pokretna kolica s hranom, pripremu hrane na štandovima na tržnicama, djelatnosti restorana i barova vezanih za transport, kada se obavljaju pomoću izdvojenih jedinica
- g) „Djelatnost pripreme pića“, uključujući barove, taverne, koktel barove, diskoteke (u kojima se ponajprije nude pića), pivnice, kafane, barove za pripremu voćnih pića i pokretne prodavače pića
- h) Djelatnost *cateringa*.

(2) Ministar pravilnicima propisuje minimalne uslove i uslove za kategoriju objekata koji se kategoriziraju od tačke a) do tačke h) ovog člana.

Član 34. (Hoteli i sličan smještaj)

(1) Skupina ugostiteljskih objekata pod nazivom „Hoteli i sličan smještaj“ uključuje pružanje usluga smještaja, u pravilu, na dnevnoj ili sedmičnoj osnovi, za kraći boravak posjetilaca.

(2) Usluge smještaja iz stava (1) ovog člana su usluge pružanja smještaja u namještenim sobama i apartmanima, s čajnom kuhinjom, osiguranjem dnevnog čišćenja i spremanja kreveta te pružanja dopunskih usluga, kao što su usluge hrane i pića, usluga parkiranja ako objekt nije u zaštićenoj zoni, usluge pranja veša, bazena za plivanje i dvorane za vježbanje, iznajmljivanje opreme za rekreaciju te opreme za konferencije i sastanke.

(3) Skupina „Hoteli i sličan smještaj“ iz stava (1) ovog člana uključuje smještaj u:

- a) hotelima
- b) hotelima baštinama
- c) turističkim naseljima (hotelska, apartmanska i slična naselja)
- d) apartmanskim hotelima
- e) motelima.

Član 35. (Odmarališta i slični objekti za kraći odmor)

(1) Skupina ugostiteljskih objekata pod nazivom „Odmarališta i slični objekti za kraći odmor“ uključuje pružanje usluga smještaja, u pravilu, na dnevnoj ili sedmičnoj osnovi, za kratki boravak posjetilaca, u prostorijama koje se sastoje od namještenih soba ili prostora za boravak i spavanje, s opremom za kuhanje ili s potpuno opremljenim kuhinjama.

(2) Usluge smještaja iz stava (1) ovog člana pružaju se u apartmanima ili stanovima u malim samostojećim, višefunkcionalnim zgradama ili grupama zgrada, samostojećim bungalovima ili seoskim kućama i kolibama u kojima se pruža veoma mali broj komplementarnih usluga, ako se uopće ikakve pružaju.

(3) Skupina ugostiteljskih objekata pod nazivom „Odmarališta i slični objekti za kraći odmor“ iz stava (1) ovog člana uključuje smještaj u:

- a) dječijim i ostalim odmaralištima
- b) stanovima za odmor i bungalovima
- c) seoskim kućama i kolibama bez usluga održavanja
- d) omladinskim hostelima i planinarskim domovima.

Član 36.

(Kampovi i prostori za kampovanje)

(1) Skupina ugostiteljskih objekata pod nazivom „Kampovi i prostori za kampovanje“ uključuje pružanje usluga smještaja u kamp-kućicama ili kamp-prikolicama, prostorima za kampovanje i logorovanje s ciljem razonode, lova ili ribolova, za posjetioce s kraćim boravkom, i pružanje usluga korištenja prostora i pratećih objekata za autodomove (kampere).

(2) Usluge smještaja iz stava (1) ovog člana pružaju se kao:

- a) smještaj u zaklonima ili praznim objektima za postavljanje šatora i/ili vreća za spavanje, bivacima.

Član 37.

(Ostali smještaj)

(1) Skupina ugostiteljskih objekata pod nazivom „Ostali smještaj“ uključuje pružanje usluga smještaja za privremeni ili duži boravak u jednokrevetnim ili višekrevetnim sobama ili domovima za studente, (sezonske) radnike migrante te ostale pojedince.

(2) Skupina ugostiteljskih objekata pod nazivom „Ostali smještaj“ iz stava (1) ovog člana uključuje:

- a) studentske domove
- b) školske domove
- c) radničke hostele
- d) prenoćišta i pansione
- e) spavaća kola na željeznici (vagoni za spavanje).

Član 38.

(Priprema i usluživanje hrane)

(1) Djelatnost pripreme i usluživanja hrane uključuje djelatnosti posluživanja hrane i pića, koje uključuju kompletne obroke ili pića za direktnu potrošnju, bez obzira na način pružanja usluga, bez obzira na to je li riječ o tradicionalnim restoranima, samoposlužnim ili brzim restoranima, u obliku trajnih ili privremenih štandova, sa ili bez sjedala.

(2) Djelatnost iz stava (1) ovog člana uključuje i djelatnosti dostavljanja pripremljenih obroka potrošačima, bilo da im je pripremljeni obrok serviran dok su na mjestu ili svako sebi servira

izložene pripremljene obroke, bilo da potrošači konzumiraju pripremljene obroke na licu mjesta, odnose ih sa sobom ili su im dostavljeni. Ovo uključuje pripremu i serviranje obroka za direktnu potrošnju s motoriziranog vozila ili kolica za serviranje obroka.

(3) Djelatnost pripreme i usluživanja hrane obavlja se u:

- a) restoranima, restoranima-salonima za posebne prilike i restoranima brze hrane
- b) kafeterijama
- c) mjestima za pripremu obroka za konzumiranje van objekta pripreme
- d) kamionima za prodaju sladoleda
- e) pokretnim kolicima s hranom
- f) priprema hrane na štandovima na tržnicama
- g) djelatnosti restorana i barova vezanih za transport, kada se obavljaju pomoću izdvojenih jedinica.

Član 39.

Djelatnosti pripreme i usluživanja pića

(1) Djelatnost pripreme i usluživanje pića uključuje djelatnosti pripremanja i serviranja pića za direktnu potrošnju na licu mjesta.

(2) Djelatnost iz stava (1) ovog člana uključuje djelatnosti:

- a) barova
- b) taverni
- c) koktel barova
- d) diskoteka (u kojima se ponajprije nude pića)
- e) pivnica
- f) kafana
- g) barova za pripremu voćnih pića
- h) pokretnih prodavača pića.

Član 40.

(Pružanje *catering* usluge)

(1) U zavisnosti od vrste objekta i nivoa usluge, *catering* usluga može biti:

- a) profesionalna *catering* usluga – *catering* usluga koju pružaju ugostiteljski objekti vrste „*catering* objekt“ i ugostiteljski objekt vrste „restoran“ koji pruža *catering* usluge
- b) povremena *catering* usluga – *catering* usluga koju pružaju ugostiteljski objekti vrste: gostionica, čevabdžinica/roštiljnica, aščinica, picerija, slastičarna i slično.

(2) Ugostiteljski objekti iz stava (1) tačke a) ovog člana mogu se baviti pružanjem *catering* usluga na osnovu ugovora s naručiocem usluga na duži period, i to za potrebe ishrane radnika, djece u produženom boravku, putnika u prevoznim sredstvima i slično te pružanjem pojedinačnih *catering* usluga za potrebe organiziranih skupova kao što su svadbe, prijemi, banketi, rođendani i slični skupovi.

(3) Ugostiteljski objekti iz stava (1) tačke b) ovog člana mogu se povremeno baviti pružanjem pojedinačnih *catering* usluga za potrebe organizacije manjih poslovnih prijema, rođendana i sličnih prigodnih događaja te pripremati, isključivo iz svog asortimana, jednostavna topla i hladna jela i/ili poslastice, i/ili pića i dostavljati ih ili dostavljati i usluživati ih na drugom mjestu ako ispunjavaju uslove propisane posebnim propisima iz oblasti ugostiteljstva.

Član 41.
(Povremene ugostiteljske usluge)

- (1) Pojedine ugostiteljske usluge mogu se povremeno pružati izvan ugostiteljskog objekta na sajmovima, festivalima, vašarima, prigodnim proslavama, na drugim javnim manifestacijama ili na prostorima namjenski uređenim za pružanje ugostiteljskih usluga, u skladu s odredbama ovog Zakona i posebnim propisima kojima se obezbjeđuje higijenska ispravnost životnih namirnica i zaštita životne sredine.
- (2) Ugostitelj može pružati ugostiteljske usluge iz stava (1) ovog člana po prethodno pribavljenom rješenju nadležnog organa kojim se odobrava pružanje ugostiteljskih usluga izvan ugostiteljskog objekta.
- (3) Ugostiteljske usluge izvan ugostiteljskog objekta mogu se obavljati na određeno vrijeme u zavisnosti od trajanja manifestacija iz stava (1) ovog člana, odnosno za vrijeme trajanja sezone.
- (4) Nadležni organ rješenjem odobrava vrstu usluge i određuje prostor, mjesto i vrijeme pružanja ugostiteljskih usluga iz stava (1) ovog člana.
- (5) Ugostiteljske usluge iz stava (1) ovog člana mogu se pružati na prostoru zaštićenog prirodnog dobra i njegove zaštićene okoline, po prethodno pribavljenoj saglasnosti nadležnog organa za poslove zaštite kulturnih dobara.
- (6) Ministar pravilnikom propisuje minimalne i sanitarno-higijenske uslove za obavljanje ugostiteljske djelatnosti izvan ugostiteljskog objekta.

Član 42.
(Ugostiteljske usluge u pokretnom objektu)

- (1) Ugostitelj može pružati pojedine ugostiteljske usluge u pokretnom objektu koji se premješta iz jednog mjesta u drugo vlastitim pogonom ili vučom, a koji ispunjava propisane minimalne i sanitarno-higijenske uslove za pružanje ugostiteljskih usluga.
- (2) U pokretnom objektu iz stava (1) ovog člana može se usluživati hrana pripremljena na drugom mjestu u originalnom pakovanju, kao i piće u originalnoj ambalaži ili na točenje uz upotrebu ambalaže za jednokratnu upotrebu.
- (3) Za obavljanje djelatnosti iz stava (1) ovog člana ugostitelj je dužan pribaviti rješenje nadležnog organa.
- (4) Nadležni organ rješenjem odobrava vrstu usluge koja se može pružati u pokretnom objektu i određuje prostor i mjesto na kojem se mogu pružati ugostiteljske usluge u pokretnom objektu.
- (5) Protiv rješenja iz stava (3) ovog člana dozvoljeno je izjaviti žalbu Ministarstvu u roku od 15 dana od dana njegovog dostavljanja.
- (6) Ministar pravilnikom propisuje način pružanja ugostiteljskih usluga u pokretnom objektu, kao i minimalne, sanitarno-higijenske i zdravstvene uslove koje moraju ispunjavati ovi objekti.

Član 43.
(Ugostiteljske usluge na plovnim objektima)

- (1) Pod uslovima utvrđenim ovim Zakonom, propisima donesenim na osnovu ovog Zakona i drugim propisima ugostitelj – fizičko lice može pružati usluge prehrane i pića na svom plovnom objektu za najviše 20 gostiju istovremeno.
- (2) Ministar pravilnikom propisuje minimalne uslove, kao i način njihovog utvrđivanja, koje moraju ispuniti objekti iz stava (1) ovog člana.
- (3) Na pružanje usluga iz stava (1) ovog člana na odgovarajući način primjenjuju se odredbe članova od 14. do 21. ovog Zakona.

POGLAVLJE VII – UGOSTITELJSKE USLUGE U DOMAĆINSTVU I SEOSKOM DOMAĆINSTVU

Član 44. (Ugostiteljske usluge u domaćinstvu)

- (1) Ugostiteljske usluge u vlastitom domaćinstvu može pružati fizičko lice državljanin Bosne i Hercegovine (u daljnjem tekstu: iznajmljivač).
- (2) Ugostiteljskim uslugama u domaćinstvu smatraju se:
 - a) usluge smještaja u sobi, apartmanu i kući za odmor, koji su vlasništvo iznajmljivača, do najviše deset soba, odnosno dvadeset kreveta.
 - b) usluge smještaja u kampu, organiziranom na zemljištu koje je vlasništvo iznajmljivača, s najviše 10 smještajnih jedinica, odnosno za 30 gostiju istovremeno, u koje se ne ubrajaju djeca u dobi do 12 godina.

Član 45. (Uslovi za dobijanje rješenja o odobrenju za pružanje ugostiteljskih usluga u domaćinstvu)

- (1) Ugostiteljske usluge u domaćinstvu može pružati iznajmljivač koji ima rješenje o odobrenju za pružanje ugostiteljskih usluga u domaćinstvu.
- (2) Rješenje o odobrenju za pružanje ugostiteljskih usluga u domaćinstvu izdaje nadležni organ na zahtjev iznajmljivača ako su ispunjeni sljedeći uslovi:
 - a) da je iznajmljivač vlasnik objekta (soba, apartman ili kuća za odmor) ili vlasnik zemljišta za kamp
 - b) da je iznajmljivač državljanin Bosne i Hercegovine
 - c) da je iznajmljivač poslovno sposobna osoba
 - d) da objekt u kojem će se pružati usluge ispunjava minimalne uslove za vrstu i uslove za kategoriju u skladu s ovim Zakonom.
- (3) Izuzetno od stava (2) tačke a) ovog člana iznajmljivaču će se izdati rješenje i ako je objekt ili zemljište za kamp u vlasništvu njegovog bračnog partnera, srodnika u pravoj liniji ili člana porodice s kojim živi u zajedničkom domaćinstvu, uz njihovu pisanu saglasnost iznajmljivaču za pružanje ugostiteljskih usluga u domaćinstvu.

Član 46. (Obavezni dokumenti koji se podnose uz zahtjev za dobijanje rješenja o odobrenju za pružanje ugostiteljskih usluga u domaćinstvu)

- (1) Uz zahtjev za dobijanje rješenja o odobrenju za pružanje ugostiteljskih usluga u domaćinstvu iznajmljivač prilaže:

- a) dokaz o vlasništvu
- b) uvjerenje o državljanstvu,
- c) uvjerenje o poslovnoj sposobnosti izdato od nadležnog centra za socijalni rad
- d) dokaz da nije izrečena mjera zabrane obavljanja djelatnosti,
- e) dokaz o ispunjenosti minimalnih uslova za vrstu i kategoriju objekta i kategorizacijom.

(2) Ministar pravilnikom propisuje minimalne uslove za vrstu, kategoriju, uslove za kategorije, oznake za kategorije, način označavanja kategorija i postupka kategorizacije objekata iz stava (1) tačke e) ovog člana.

Član 47.

(Sadržaj i rok za donošenje rješenja o odobrenju za pružanje ugostiteljskih usluga u domaćinstvu)

- (1) Rješenje o odobrenju za pružanje ugostiteljskih usluga u domaćinstvu sadrži:
- a) lične podatke iznajmljivača
 - b) mjesto, ulicu i broj objekta u kojem se pruža usluga
 - c) vrstu i kategoriju objekta u kojem se pruža usluga
 - d) broj smještajnih jedinica i kreveta unutar objekta za iznajmljivanje.
- (2) Nadležni organ donosi rješenje u roku od 15 dana od dana prijema potpunog zahtjeva.
- (3) Rješenje o odobrenju za pružanje ugostiteljskih usluga u domaćinstvu upisuje se u registar iznajmljivača i seoskih domaćinstava koja pružaju ugostiteljske usluge koji vodi nadležni organ koji je i izdao rješenje.
- (4) Rješenje iz stava (3) ovog člana dostavlja se Poreznoj upravi FBiH, nadležnoj tržišno-turističko-ugostiteljskoj inspekciji i drugim organima koji vrše nadzor ili vode službenu evidenciju u oblasti ugostiteljstva.
- (5) Ministar pravilnikom propisuje oblik, sadržaj i način vođenja registra iz stava (3) ovog člana.

Član 48.

(Prestanak važenja rješenja o odobrenju za pružanje ugostiteljskih usluga u domaćinstvu)

- (1) Rješenje o odobrenju za pružanje ugostiteljskih usluga u domaćinstvu prestaje važiti:
- a) u slučaju smrti iznajmljivača
 - b) u slučaju odjave iznajmljivača, danom navedenim u odjavi ili danom podnošenja odjave nadležnom organu ili Ministarstvu ako je iznajmljivač u odjavi utvrdio datum raniji od dana podnošenja odjave
 - c) ako se utvrdi prestanak ispunjavanja nekog od obaveznih uslova za dobijanje rješenja o odobrenju za pružanje ugostiteljskih usluga u domaćinstvu iz člana 45. ovog Zakona
 - d) ako se inspekcijom nadzorom utvrdi da nisu ispunjeni uslovi propisani ovim Zakonom, a utvrđeni nedostaci nisu otklonjeni u ostavljenom roku.
- (2) U slučaju smrti iznajmljivača članovi zajedničkog domaćinstva mogu nastaviti pružati ugostiteljske usluge u domaćinstvu najduže u trajanju do dvanaest mjeseci.
- (3) O prestanku važenja rješenja o odobrenju za pružanje ugostiteljskih usluga u domaćinstvu nadležni organ donosi rješenje na koje stranka ima pravo žalbe nadležnom kantonalnom ministarstvu u roku od 15 dana od dana dostavljanja.

Član 49.
(Obaveze iznajmljivača)

(1) U pružanju ugostiteljskih usluga u domaćinstvu iznajmljivač je u skladu s odredbama ovog Zakona dužan da:

- a) vidno istakne natpis s oznakom vrste i kategorije objekta, utvrđene rješenjem nadležnog organa
- b) u objektu vidno istakne cijene usluga koje nudi, kao i informaciju o obavezi plaćanja boravišne takse, te da se pridržava istaknutih cijena
- c) vodi knjigu gostiju na principima urednosti i tačnosti.

(2) Ministar pravilnikom propisuje oblik i način vođenja knjige gostiju iz stava (1) tačke c) ovog člana.

Član 50.
(Ugostiteljske usluge u seoskom domaćinstvu)

(1) Seosko domaćinstvo, kao iznajmljivač, pruža ugostiteljske usluge smještaja:

- a) u sobi, apartmanu ili seoskoj kući za odmor do najviše deset soba, odnosno 20 kreveta
- b) u kampu, organiziranom na zemljištu u vlasništvu seoskog domaćinstva, s najviše 15 smještajnih jedinica, odnosno za 50 gostiju istovremeno, u koje se ne ubrajaju djeca u dobi do 12 godina.

Član 51.
(Uslovi za izdavanje rješenja o odobrenju za pružanje ugostiteljskih usluga u seoskom domaćinstvu)

(1) Rješenje o odobrenju za pružanje ugostiteljskih usluga u seoskom domaćinstvu izdaje nadležni organ na zahtjev fizičkog lica, člana seoskog domaćinstva, ako su ispunjeni sljedeći uslovi:

- a) da je iznajmljivač vlasnik objekta (soba, apartman ili kuća za odmor) ili vlasnik zemljišta za kamp
- b) da je iznajmljivač državljanin Bosne i Hercegovine
- c) da je iznajmljivač poslovno sposobna osoba
- d) da objekt u kojem će se pružati usluge ispunjava minimalne uslove za vrstu i uslove za kategoriju u skladu s ovim Zakonom.

(2) Izuzetno od stava (1) tačke a) ovog člana fizičkom licu članu seoskog domaćinstva će se izdati rješenje i ako je objekt ili zemljište za kamp u vlasništvu njegovog bračnog partnera, srodnika u pravoj liniji ili člana porodice s kojim živi u zajedničkom seoskom domaćinstvu, uz njihovu pisanu saglasnost za pružanje ugostiteljskih usluga u seoskom domaćinstvu.

Član 52.
(Obavezni dokumenti koji se podnose uz zahtjev za dobijanje rješenja o odobrenju za pružanje ugostiteljskih usluga u seoskom domaćinstvu)

(1) Ugostiteljske usluge u seoskom domaćinstvu pružaju članovi seoskog domaćinstva koji imaju rješenje o odobrenju za pružanje ugostiteljskih usluga u seoskom domaćinstvu.

(2) Uz zahtjev za dobijanje rješenja o odobrenju za pružanje ugostiteljskih usluga u seoskom domaćinstvu, fizičko lice član seoskog domaćinstva, na koje će glasiti rješenje, prilaže sljedeće dokumente:

- a) dokaz o vlasništvu
- b) uvjerenje o državljanstvu
- c) dokaz o poslovnoj sposobnosti
- d) dokaz o ispunjenosti minimalnih uslova za vrstu i kategoriju objekta i kategorizacijom.

(3) Ministar pravilnikom propisuje minimalne uslove za vrstu, kategoriju, uslove za kategorije, oznake za kategorije, način označavanja kategorija i postupka kategorizacije objekata iz stava (2) tačke d) ovog člana.

Član 53.

(Sadržaj i rok za donošenje rješenja o odobrenju za pružanje ugostiteljskih usluga u seoskom domaćinstvu)

(1) Rješenje o odobrenju za pružanje ugostiteljskih usluga u seoskom domaćinstvu sadrži:

- a) lične podatke fizičkog lica člana seoskog domaćinstva
- b) mjesto, ulicu i broj objekta u kojem se pruža usluga
- c) vrstu (usluge smještaja u sobi, apartmanu ili seoskoj kući za odmor, usluge smještaja u kampu) i kategoriju objekta u kojem se pruža usluga
- d) broj smještajnih jedinica i kreveta unutar objekta za iznajmljivanje.

(2) Nadležni organ iz člana 4. stava (3) donosi rješenje u roku od 15 dana od dana prijema potpunog zahtjeva.

(3) Rješenje o odobrenju za pružanje ugostiteljskih usluga u seoskom domaćinstvu upisuje se u registar iznajmljivača i seoskih domaćinstava koja pružaju ugostiteljske usluge koji vodi nadležni organ koji je i izdao rješenje.

(4) Ministar pravilnikom propisuje oblik, sadržaj i način vođenje registra iz stava (3) ovog člana.

Član 54.

(Prestanak važenja rješenja o odobrenju za pružanje ugostiteljskih usluga u seoskom domaćinstvu)

(1) Rješenje o odobrenju za pružanje ugostiteljskih usluga u seoskom domaćinstvu prestaje važiti:

- a) u slučaju smrti fizičkog lica
- b) odjavom fizičkog lica na koje je glasilo rješenje danom navedenim u odjavi ili danom podnošenja odjave nadležnom organu ako je fizičko lice na koje je glasilo rješenje u odjavi utvrdilo datum raniji od dana podnošenja odjave
- c) ako se utvrdi prestanak ispunjavanja nekog od obaveznih uslova za dobijanje rješenja o odobrenju za pružanje ugostiteljskih usluga u seoskom domaćinstvu iz člana 51. ovog zakona
- d) ako se inspekcijskim nadzorom utvrdi da nisu ispunjeni uslovi propisani ovim Zakonom, a utvrđeni nedostaci nisu otklonjeni u ostavljenom roku.

(2) U slučaju smrti fizičkog lica na koje je glasilo rješenje članovi seoskog domaćinstva mogu nastaviti pružati ugostiteljske usluge u seoskom domaćinstvu najduže u trajanju do dvanaest mjeseci.

(3) O prestanku važenja rješenja o odobrenju za pružanje ugostiteljskih usluga u seoskom domaćinstvu nadležni organ donosi rješenje na koje stranka ima pravo žalbe nadležnom kantonalnom ministarstvu u roku od 15 dana od dana dostavljanja.

Član 55. **(Obaveze seoskog domaćinstva)**

(1) U pružanju ugostiteljskih usluga u seoskom domaćinstvu koje pruža usluge smještaja fizičko lice na koje glasi rješenje o odobrenju za pružanje ugostiteljskih usluga u seoskom domaćinstvu obavezno je da:

- a) vidno istakne natpis s oznakom vrste i kategorije objekta, utvrđene rješenjem nadležnog organa
- b) u objektu vidno istakne cijenu usluga koje nudi, kao i informaciju o obavezi plaćanja boravišne takse, te da se pridržava istaknutih cijena
- c) vodi knjigu gostiju na principima urednosti i tačnosti.

(2) Ministar pravilnikom propisuje oblik i način vođenja knjige gostiju iz stava (1) tačke c) ovog člana.

POGLAVLJE VIII – KAMPOVANJE

Član 56. **(Usluge kampovanja)**

(1) Ugostitelji mogu organizirati i pružati usluge kampovanja pod uslovima utvrđenim ovim Zakonom.

(2) Usluge kampovanja mogu se obavljati u domaćinstvima i seoskim domaćinstvima u skladu s članom 36. ovog Zakona.

(3) Kampovanje se vrši u organiziranim kampovima, pod kojima se smatraju kampovi koji se nalaze na podesnom, namjenski uređenom i ograđenom zemljištu, s obezbijeđenom pratećom infrastrukturom (sanitarno-higijenski uslovi, mokri čvor, odlaganje smeća), na kojem se gostima iznajmljuju prostori na otvorenom (kamp mjesto, kamp parcela) za smještaj vlastite ili u kampu iznajmljene opreme, a mogu se pružati i usluge smještaja u objektima (kućica u kampu i bungalov), kao i usluge hrane i pića.

Član 57. **(Privremeni kampovi)**

Izuzetno, za vrijeme održavanja sportskih, kulturno-umjetničkih ili drugih manifestacija dozvoljeno je organiziranje privremenog kampa, u kojem slučaju kamp ne mora ispunjavati opće minimalne uslove u pogledu izgradnje objekata i prateće infrastrukture.

Član 58. **(Rješenje za odobrenje obavljanja usluge kampovanja)**

(1) Za obavljanje djelatnosti kampovanja iz članova 56. i 57. ovog Zakona pribavlja se rješenje nadležnog organa.

(2) Nadležni organ rješenjem određuje prostor (zemljište), mjesto i vrijeme pružanja usluga kampovanja iz članova 56. i 57. ovog Zakona.

(3) Rješenje nadležnog organa kojim se odobrava obavljanje djelatnosti u privremenom kampu sadrži i podatke o organizatoru kampovanja u privremenom kampu, vrijeme za koje se prostor ili zemljište može koristiti za kampovanje, kao i obaveze organizatora u pogledu obezbjeđenja privremenih sanitarno-higijenskih objekata.

(4) Protiv rješenja iz stava (1) ovog člana dozvoljena je žalba Ministarstvu u roku od 15 dana od dana njegovog dostavljanja.

(5) Ministar pravilnikom propisuje minimalne uslove i ekološke uslove za pružanje ugostiteljskih usluga u kampu.

(6) Zabranjeno je kampovanje i postavljanje šatora, kamp-kućica i druge opreme za kampovanje izvan prostora određenih za kampovanje.

POGLAVLJE IX – REGISTRI U UGOSTITELJSTVU

Član 59.

(Opći elektronski registar ugostiteljstva u Federaciji BiH)

(1) Ministarstvo vodi Opći elektronski registar ugostiteljstva u Federaciji BiH (u daljnjem tekstu: Opći registar) u koji se upisuju podaci o ugostiteljima, ugostiteljskim objektima i ugostiteljskim uslugama.

(2) Opći registar ugostiteljstva iz stava (1) ovog člana je javan.

(3) Opći registar čine:

- a) Registar ugostitelja prema vrstama objekata iz člana 33. ovog Zakona
- b) Registar iznajmljivača i seoskih domaćinstava.

(4) Ministar pravilnikom propisuje oblik, sadržaj i način vođenja Općeg registra, kao i obavezu nadležnih organa za dostavljanja podataka koji se unose u registar, te postupak i način brisanja iz registra.

POGLAVLJE X – KATEGORIZACIJA UGOSTITELJSKIH OBJEKATA

Član 60.

(Kategorizacija)

(1) Obaveznoj kategorizaciji podliježu svi objekti koji pružaju uslugu smještaja iz člana 33. ovog Zakona.

(2) Ugostiteljski objekti za smještaj razvrstavaju se u vrste i kategorije u skladu sa standardima propisanim za pojedine vrste tih objekata.

(3) Ugostiteljski objekti za smještaj iz skupine „Hoteli i sličan smještaj“ mogu se razvrstati u podvrstu i prema posebnim uslugama koje se u njima pružaju.

(4) Kategorija ugostiteljskog objekta označava se odgovarajućim brojem zvjezdica ili drugim znakovima na standardnoj ploči.

Član 61.

(Zahtjev za određivanje vrste i kategorije)

(1) Zahtjev za određivanje vrste i kategorije ugostiteljskih objekata ugostitelj podnosi nadležnom organu iz člana 4. ovog Zakona.

(2) Ministar pravilnikom propisuje minimalne uslove za utvrđivanje kategorije, vrste i podvrste ugostiteljskih objekata, kao i ugostiteljske usluge koje se pružaju i mogu pružati u pojedinoj vrsti ugostiteljskog objekta.

Član 62. **(Postupak kategorizacije)**

(1) Kategorizaciju ugostiteljskih objekata za smještaj vrši nadležni organ iz člana 4. ovog Zakona u zavisnosti od vrste ugostiteljskog objekta.

(2) Rukovodilac nadležnog organa donosi rješenje o razvrstavanju vrste odnosno podvrste ugostiteljskog objekta u određenu kategoriju.

(3) Ministar pravilnikom utvrđuje način provođenja postupka kategorizacije ugostiteljskih objekata.

(4) Izuzetno, rukovodilac nadležnog organa može donijeti privremeno rješenje za određivanje kategorije u trajanju do šest mjeseci ako utvrdi da ugostitelj može u kratkom roku otkloniti određena odstupanja od utvrđene kategorije.

(5) Nadležni organ po službenoj dužnosti vrši ponovnu kategorizaciju ugostiteljskih objekata (rekategorizaciju) nakon što istekne rok od pet godina od dana izdatog rješenja o kategorizaciji, o čemu donosi rješenje.

(6) Nadležni organ po službenoj dužnosti vodi računa o isteku roka iz stava (5) ovog člana.

(7) Rješenje iz stavova (2) i (5) ovog člana je konačno i protiv istog nije dozvoljena žalba, ali se može pokrenuti upravni spor pred nadležnim sudom.

Član 63. **(Određivanje podvrste hotela i turističkog naselja)**

(1) Razvrstavanje ugostiteljskih objekata za smještaj vrste hotel i turističko naselje u podvrstu vrši nadležni organ iz člana 4. ovog Zakona, na zahtjev ugostitelja.

(2) Rukovodilac nadležnog organa donosi rješenje kojim razvrstava ugostiteljski objekt vrste hotel u podvrstu, odnosno rješenje kojim se utvrđuje ispunjenost uslova za datu podvrstu.

(3) Rješenje iz stava (2) ovog člana je konačno i protiv istog nije dozvoljena žalba, ali se može tužbom pokrenuti upravni spor pred nadležnim sudom u skladu s propisima o upravnom postupku.

Član 64. **(Promjena kategorije ugostiteljskog objekta)**

(1) Promjena kategorije ugostiteljskog objekta vrši se na način i po postupku propisanom za određivanje kategorije ugostiteljskog objekta.

(2) Ako se u postupku nadzora utvrdi da ugostiteljski objekt odstupa od propisanih standarda za kategoriju ugostiteljskog objekta, rješenjem se utvrđuje prestanak ranije izdatog rješenja o utvrđivanju kategorije.

(3) Protiv rješenja nadležnog organa iz stava (1) ovog člana dozvoljena je žalba Ministarstvu u roku od 15 dana od dana njegovog dostavljanja.

(4) U slučaju iz stava (1) ovog člana, nakon pravosnažnosti rješenja, ugostitelj je obavezan da ukloni standardnu ploču koja mu je utvrđena ranijim rješenjem.

(5) Rješenje Ministarstva iz stava (3) ovog člana je konačno i protiv istog nije dozvoljena žalba, ali se može tužbom pokrenuti upravni spor pred nadležnim sudom.

Član 65. (Standardna ploča)

(1) Ugostiteljski objekti iz člana 60. stava (4) označeni su standardnom pločom.

(2) Ugostitelj snosi troškove izrade ploče iz stava (1) ovog člana.

(3) Ministar pravilnikom propisuje izgled i oblik standardnih ploča za označavanje vrste i kategorije ugostiteljskog objekta.

POGLAVLJE XI – UPRAVNI NADZOR

Član 66. (Upravni nadzor)

Upravni nadzor nad primjenom ovog Zakona i propisa donesenih na osnovu ovog Zakona vrši Ministarstvo.

Član 67. (Inspekcijski nadzor)

Inspekcijski nadzor nad provođenjem odredaba ovog Zakona i propisa donesenih za njegovo provođenje, te pojedinačnih akata, uslove i način rada ugostitelja, provodi Federalna uprava za inspekcijske poslove putem federalnih tržišnih i sanitarnih inspektora, kantonalna uprava za inspekcijske poslove i gradska/općinska uprava za inspekcijske poslove u skladu s članom 4. ovog Zakona u okviru svoje nadležnosti.

Član 68. (Posebni poslovi u nadležnosti federalnih inspektora)

Osim poslova navedenih u članu 67. ovog Zakona, Federalna uprava za inspekcijske poslove obavlja i druge poslove koji su ovim Zakonom i drugim propisima donesenim na osnovu ovog Zakona stavljeni u njenu nadležnost.

Član 69. (Zaštita ličnih podataka)

U prikupljanju, evidentiranju, obradi i korištenju ličnih i drugih podataka inspektor posebno vodi računa o zaštiti ličnih i drugih podataka te njihovoj tajnosti i povjerljivosti, postupajući u skladu s odredbama propisa kojima se regulira oblast zaštite ličnih i tajnih podataka.

Član 70. (Rješenje o otklanjanju nedostataka)

(1) Ako u vršenju inspekcijskog nadzora nad primjenom odredaba ovog Zakona ili propisa donesenih za njegovo provođenje inspektor utvrdi da propis nije primijenjen ili je nepravilno primijenjen, pored općih ovlaštenja propisanih posebnim zakonom, dužan je da donese rješenje kojim se nalaže otklanjanje utvrđenih nedostataka i da odredi rok za njihovo otklanjanje.

(2) Ako se utvrđene nepravilnosti iz stava (1) ovog člana ne otklone u ostavljenom roku, inspektor će izdati prekršajni nalog ili podnijeti zahtjev za pokretanje prekršajnog postupka.

(3) Žalba protiv rješenja iz stava (1) ovog člana ne odgađa izvršenje rješenja.

Član 71. **(Rješenje o zabrani obavljanja ugostiteljske djelatnosti)**

(1) Inspektor će rješenjem zabraniti daljnje obavljanje ugostiteljske djelatnosti do otklanjanja utvrđenih nedostataka ako u provođenju inspekcijskog nadzora utvrdi da se ugostiteljska djelatnost obavlja:

- a) bez rješenja za obavljanje ugostiteljske djelatnosti
- b) u suprotnosti s rješenjem kojim se odobrava obavljanje ugostiteljske djelatnosti
- c) bez rješenja nadležnog organa kojim se utvrđuje kako prostor, uređaji i oprema za obavljanje ugostiteljske djelatnosti udovoljavaju propisanim uslovima za obavljanje te djelatnosti
- d) zabrana obavljanja ugostiteljske djelatnosti u smislu ovog člana će se izreći i ako se inspektoru onemogućí vršenje poslova inspekcijskog nadzora.

(2) Rješenje o privremenoj zabrani otprema se stranci najkasnije sljedeći radni dan od dana zaključenja zapisnika o inspekcijskom nadzoru.

(3) Žalba protiv rješenja iz stava (1) ovog člana ne odgađa izvršenje rješenja.

(4) Subjektu nadzora kojem je zabranjen rad inspektor će pečaćenjem ili na drugi prikladan način zatvoriti prostorije u kojima obavlja ugostiteljsku djelatnost, te može privremeno oduzeti opremu, uređaje, sredstva za rad i prevozna sredstva kojima obavlja nezakonitu djelatnost, do konačne odluke.

(5) Ako je izvršeno privremeno oduzimanje predmeta, inspektor je obavezan uz zahtjev za pokretanje prekršajnog postupka za učinjeni prekršaj, odnosno uz prijavu za učinjeno krivično djelo, izvijestiti nadležni organ o tome.

(6) U vezi s održavanjem i čuvanjem privremeno oduzetih predmeta, kao i naknadom troškova prinudnog izvršenja i troškovima eventualne štete nastale prinudnim izvršenjem, primjenjuju se odredbe propisa kojim je reguliran inspekcijski nadzor u Federaciji BiH.

Član 72. **(Obavještenje nadležnog organa o povredi propisa)**

Ako inspektor prilikom obavljanja inspekcijskog nadzora utvrdi nepravilnosti ili nepridržavanje propisa za čiji nadzor nije nadležan, obavještava nadležni organ bez odgađanja, a najkasnije u roku od osam dana.

Član 73. **(Nadležni organ za rješavanje po žalbi)**

(1) Protiv rješenja kantonalnog inspektora, kada nadzor vrši po ovom Zakonu, može se izjaviti žalba direktoru Federalne uprave za inspekcijske poslove, kao drugostepenom organu, u roku od osam dana od dana dostavljanja rješenja.

(2) Protiv rješenja koje u prvom stepenu donosi federalni inspektor može se izjaviti žalba Ministarstvu u roku od osam dana od dana dostavljanja rješenja.

POGLAVLJE XII – KAZNENE ODREDBE

Član 74.

(1) Novčanom kaznom u iznosu od 3.000,00 KM do 30.000,00 KM kaznit će se za prekršaj ugostitelj kao pravno lice ako:

- a) obavlja ugostiteljsku djelatnost u suprotnosti s članom 7. ovog Zakona
- b) obavlja ugostiteljsku djelatnost u suprotnosti s članom 9. stavovima (1) do (7) ovog Zakona
- c) obavlja ugostiteljsku djelatnost u suprotnosti s članom 10. ovog Zakona
- d) u ostavljenom roku ne otkloni nedostatke utvrđene rješenjem inspektora vezane za ispunjavanje propisanih općih uslova u pogledu poslovnih prostorija, uređaja, opreme i zaposlenih, a u postupku inspekcijske kontrole se utvrdi da ne ispunjava (član 70. stav (2))
- e) obavlja ugostiteljsku djelatnost u kampu bez posjedovanja rješenja nadležnog organa za obavljanje te djelatnosti (član 58).

(2) Za prekršaj iz stava (1) ovog člana kaznit će se odgovorno lice u pravnom licu novčanom kaznom od 2.000,00 KM do 10.000,00 KM.

Član 75.

(1) Novčanom kaznom u iznosu od 2.000,00 KM do 15.000,00 KM kaznit će se za prekršaj ugostitelj kao pravno lice ako:

- a) obavlja ugostiteljsku djelatnost u suprotnosti s članom 14. stavovi (1), (2) i (3)
- b) prilikom oglašavanja i reklamiranja postupno članu 19.
- c) vrši prodaju i usluživanje alkoholnih pića licima mlađim od 18 godina (član 20. stav (1))
- d) obavlja profesionalnu *catering* uslugu bez ugovora s naručiocem usluga ili ne ispunjava uslove za pružanje usluga u *catering* objektima, odnosno za pružanje povremene *catering* usluge za potrebe organizacije manjih poslovnih prijema, rođendana i sličnih prigodnih događaja (član 40. stav (2))
- e) u ugostiteljskom objektu vrste: gostionica, ćevabdžinica/roštiljnica, aščinica, picerija i slastičarna pruža profesionalnu *catering* uslugu (član 40. stav (1) tačka b))
- f) ne ukloni standardnu ploču (član 64. stav (4)), vrši ugostiteljske usluge izvan ugostiteljskog objekta u suprotnosti s članom 41. stavovi (1) do (5) ovog Zakona

- g) obavlja ugostiteljsku djelatnost u kampu u suprotnosti s članom 56. stavom (1)
- h) pruža ugostiteljske usluge na vodama u suprotnosti s članom 42.
- i) obavlja ugostiteljsku djelatnost u objektima koji podliježu obaveznoj kategorizaciji, a ne podnese zahtjev za utvrđivanje kategorije Ministarstvu, odnosno nadležnom organu (član 62. stav (3)).

(2) Za prekršaj iz stava (1) ovog člana kaznit će se odgovorno lice u pravnom licu novčanom kaznom od 1.500,00 KM do 7.500,00 KM.

(3) Novčanom kaznom u iznosu od 1.500,00 KM do 10.000 KM kaznit će se fizičko lice vlasnik ugostiteljskog objekta ako obavlja ugostiteljsku djelatnost protivno članu 14. stavovima (1) do (3), članovima 19. i 20. ovog Zakona.

Član 76.

Novčanom kaznom u iznosu od 1.000,00 KM do 5.000,00 KM kaznit će se za prekršaj fizičko lice ako:

- a) postupa u suprotnosti s članom 8. i članom 9. stavovi (1) do (7) ovog Zakona.

Član 77.

Novčanom kaznom u iznosu od 1.000,00 KM do 5.000,00 KM kaznit će se iznajmljivač fizičko lice:

- a) ako obavlja djelatnost pružanja ugostiteljskih usluga u domaćinstvu bez rješenja o odobrenju iz člana 45. stava (1) ovog Zakona
- b) ako pruža ugostiteljske usluge u domaćinstvu suprotno članu 49. ovog Zakona.

Član 78.

Novčanom kaznom u iznosu od 1.000,00 KM do 5.000,00 KM kaznit će se fizičko lice kao član seoskog domaćinstva ako:

- a) pruža ugostiteljske usluge u seoskom domaćinstvu bez rješenja o odobrenju iz člana 51. stava (1) ovog Zakona
- b) pruža ugostiteljske usluge u seoskom domaćinstvu suprotno članu 55. ovog Zakona.

Član 79.

Novčanom kaznom u iznosu od 100,00 KM do 500,00 KM kaznit će se za prekršaj fizičko lice

- a) koje kampuje izvan prostora određenih za kampovanje (član 56. stav (3)).

Član 80.

(1) Za prekršaje iz članova 70. i 71. ovog Zakona koji su počinjeni od istog ugostitelja, u istom ugostiteljskom objektu drugi put u roku od dvije godine od dana pravosnažnosti prvog rješenja o prekršaju, odnosno konačnosti i izvršnosti prekršajnog naloga, pored novčane

kazne, izreći će se i zaštitna mjera zabrane obavljanja ugostiteljske djelatnosti u tom objektu u trajanju od jednog do tri mjeseca.

(2) Za učinjene prekršaje iz članova 70. i 71. ovog Zakona koji su počinjeni od istog ugostitelja, u istom ugostiteljskom objektu po treći put u roku od dvije godine od dana pravosnažnosti prvog rješenja o prekršaju, odnosno konačnosti i izvršnosti prekršajnog naloga, pored novčane kazne, izreći će se i zaštitna mjera zabrane obavljanja ugostiteljske djelatnosti u tom objektu u trajanju od tri do šest mjeseci.

POGLAVLJE XIII – PRELAZNE I ZAVRŠNE ODREDBE

Član 81. (Obaveza usklađivanja poslovanja)

Ugostitelji koji obavljaju ugostiteljsku djelatnost uskladit će svoje poslovanje s odredbama ovog zakona u roku od godinu dana od dana stupanja na snagu ovog Zakona.

Član 82. (Započeti postupci)

Postupci započeti po propisima koji su važili do dana stupanja na snagu ovog Zakona okončat će se po tim propisima.

Član 83. (Obaveza donošenja podzakonskih akata)

(1) Ministar će u roku od šest mjeseci od dana stupanja na snagu ovog Zakona donijeti pravilnik o primjeni zakona o ugostiteljstvu Federacije BiH kojim će regulirati:

- a) sadržaj, obrazac i način vođenja knjige gostiju i knjige žalbi u ugostiteljskim objektima (član 16. stav (3))
- b) oblik, sadržaj i način vođenja registra ugostitelja (član 25. stav (2))
- c) oblik, sadržaj i način vođenja registra iznajmljivača i seoskih domaćinstava koja pružaju ugostiteljske usluge (član 47. stav (3) i član 53. stav (3))
- d) oblik, sadržaj i način vođenja knjige gostiju za iznajmljivače i seoska domaćinstva (član 49. stav (2) i član 55. stav (2))
- e) oblik, sadržaj, način vođenja i način dostavljanja podataka koji se unose u Opći elektronski registar ugostiteljstva (član 59. stav (4))
- f) način provođenja postupka kategorizacije ugostiteljskih objekata (član 62. stav (3)).

(2) Ministar će u roku od šest mjeseci od dana stupanja na snagu ovog Zakona donijeti pravilnik o uslovima i načinu pružanja ugostiteljskih usluga kojim će regulirati:

- a) minimalne uslove u pogledu uređenja i opreme, ugostiteljskih objekata i usluga (član 9. stav (7))
- b) minimalne uslove i uslove za kategoriju objekata koji se kategoriziraju (član 33. stav (2))
- c) minimalne i sanitarno-higijenske uslove za obavljanja ugostiteljske djelatnosti izvan ugostiteljskog objekta (član 41. stav (6))
- d) minimalne, sanitarno-higijenske i zdravstvene uslove za pružanje usluga u pokretnim objektima (član 42. stav (6))
- e) minimalne uslove za pružanje usluga na plovnim objektima (član 43. stav (2))
- f) minimalne uslove za vrstu, kategoriju, uslove za kategorije, oznake za kategorije, način označavanja kategorija i postupka kategorizacije objekata za pružanje

ugostiteljskih usluga u domaćinstvu i seoskom domaćinstvu (član 46. stav (2) i član 52. stav (3))

- g) minimalne i ekološke uslove za pružanje ugostiteljskih usluga u kampu (član 58. stav (5))
- h) minimalne uslove za utvrđivanje kategorije, vrste i podvrste ugostiteljskih objekata, kao i ugostiteljske usluge koje se mogu pružati u pojedinoj vrsti ugostiteljskog objekta (član 61. stav (2))
- i) izgled i sadržaj standardnih ploča za označavanje kategorije ugostiteljskog objekta (član 65. stav 3)).

(3) Ministar i ministar zdravstva će u roku od šest mjeseci od dana stupanja na snagu ovog zakona donijeti pravilnik kojim propisuju sanitarne uslove za ugostiteljske objekte koji pružaju usluge pripremanja i usluživanja duhana za vodenu lulu (član 17. stav (2)).

Član 84. **(Primjena ranijih propisa)**

Do donošenja podzakonskih akata na osnovu ovog Zakona primjenjivat će se podzakonski akti doneseni na osnovu Zakona o ugostiteljskoj djelatnosti („Službene novine Federacije BiH“ broj: 32/09), ako nisu u suprotnosti s ovim Zakonom.

Član 85. **(Ravnopravnost spolova)**

Gramatička terminologija korištena u ovom Zakonu podrazumijeva oba spola.

Član 86. **(Prestanak važenja)**

Danom stupanja na snagu ovog Zakona prestaje važiti Zakon o ugostiteljskoj djelatnosti („Službene novine Federacije BiH“ broj: 32/09).

Član 87. **(Stupanje na snagu)**

Ovaj Zakon stupa na snagu osmog dana od dana objave u „Službenim novinama Federacije BiH“.